

全
華
叢
書

全華叢書

王忠文公集卷八

明王禕撰

郡後學胡鳳丹月樵校梓

文丞相畫像記

右宋丞相文信公畫像公諱天祥字履善廬陵人年二十以寶祐丙辰擢進士第一咸淳壬申三十有六卽致其事不仕德祐元年起知贛州時國事已蹙其歲乙亥帥義師勤王至臨安明年丙子拜右丞相於是宋氏已不國矣又二年戊寅公在潮州被擄以北留燕四年卒以不屈死至元十九年壬午歲也嗚呼

自古人臣秉忠執節以身死國者有之矣然未有盛於公者也觀其從容蹈道慷慨就義天地可易而志不改金石可變而操愈堅其視死如歸誠有非苟然者人孰無死惟死得其所故雖死而不泯公之死有繫於三綱五常爲甚重是可謂能處死矣豈非死得其所者歟嗚呼宋氏有國一用科目以取士當其盛時以道德文章功烈顯融於世者多矣及其亡也非是得一人焉如公者以忠義大節爲之殿三百餘年作人之效不遂終於寥寥乎是則公之所爲死其繫

於天下國家固爲尤重而不輕所謂死有重於泰山者一也自予少時讀公吟嘯集及北行日厯具悉其不屈狀後又得其本傳伏讀之知公爲益詳未嘗不感憤歎息以爲忠義大節近世以來無有如公之盛者及來吳中復得識公遺像覩其面目嚴凜生氣肅然向之感憤歎息者於是尤拳拳焉昔歐陽子記王彥章畫像備致希慕之意且謂其所不泯者不繫乎畫之存不存嗟乎彥章固爲死節矣揆之於公猶有可議者使歐陽子得公死事論次之則其希慕又當

何如也嗚呼畫像之存公之不泯雖不繫於此抑百世之下拜公之象有不感憤歎息而希慕焉者尙爲有人心也哉畫像爲鄧某所造今藏袁泰氏家云

慈溪縣學記

慈溪有學始於宋慶厯間劉君在中林君肇相繼爲令因舊制重作孔子廟復治其四旁爲學舍講堂設師弟子以興于學後更廢弛屢經繕治二百四十餘年入國朝元貞丙申廟學俱以菑毀爲政者嘗一新之又六十年當至正甲午而陳君麟來尹茲邑覩其

規制褊陋屋室蠹壞愀然歎曰學政之廢興長民者之責也我其敢不以爲己任者聘番陽徐勉會稽錢宰兩先生爲弟子師將盡撤棟宇之舊而新是圖適時難虞疆圉多故方務訓輯師旅以禦外患旣而威惠並著境內晏安乃遂大興土木捐己俸爲眾倡僚佐士民皆相率出錢致助莫敢後於是禮殿以及兩廡重門悉易新構而講藝之堂棲士之廬先賢之祠校官之舍至於庖湍庫庾各以序爲峻其垣牆端其衛道內外規制舉稱其度無或不新焉其位置大抵

仍舊而崇高宏廣鞏固礱密非復昔比矣始事於丙申之某月訖工於丁酉之某月役成君旣帥士者行舍菜禮教諭崔植以謂賢侯作興之功不宜無所紀述書來屬禕書其成績蓋古者惟有學而入廟後世或有廟而無學廟學兼備莫於今爲盛自京師達于郡邑海隅徼塞四方萬里之外春秋祭奠歲事惟謹而弦誦之聲洋洋盈耳藹乎三代之遺風焉夫何比年以來宇內兵興儒服俎豆之事往往而廢獨慈溪得賢師帥如吾陳君本疆而用裕文事武備設施有

方不以于戈廢禮樂而學政之修如此古之學不惟
祭祀鄉射養老勞農尊賢使能攷藝選言之事卽是
焉講而出兵受成論獄訊囚之故無不由之君之於
慈溪其庶幾復古之意者矣是故魯修泮宮詩人頌
之有曰穆穆魯侯敬明其德又曰濟濟多士克廣德
心上下之間相成以德而逆道之人卒化於善故又
曰旣作泮宮淮夷攸服贊美之辭必舉乎德而土木
之功略不復道可以知所本矣今賢侯之德嘉惠乎
斯文已厚士之游息於斯者日新其德以稱夫興學

之意將見其効之所及無不順服於德化魯人之頌
其不復作於今哉昔慶厯之記臨川王荆公實爲之
凡先王立學之原教學之法論之爲詳顧禕末學何
敢措辭然念與君交有素誼不得苟讓輒序次其歲
月使刻諸麗牲之石君字文昭永嘉人起家甲午乙
科進士初筮卽製邑慈溪治行爲浙東最云

漢南北軍記

南北軍漢制也漢受明命撫方夏乃西顧卜宅作都
長安城闕宮室光明神麗固足以備國制而昭皇威

隆上都而觀萬國矣重惟天子之都宜有重兵所以
壯根本而嚴衛翼者庶其在此蓋上天之象以羽林
爲天軍黃帝之聖以兵師爲營衛王者規天法聖則
爪牙之衛詎可缺諸高皇帝以神武之資躬提三尺
糾集義旅洒掃宇內天戈所麾蓬宇消釋五年馬上
蝨鞬整而汗介冑縛嬰斬羽天下旣混爲一任罷之
兵佚諸農晦巴渝北貉無勤遠人臥鼓包戈將與天
下元元相安於無事矣然而強宗豪姓盤互關東而
材官騎士散爲郡國必虎符羽檄召而後來帝室皇

居苟無武卒銳士以衛翼之殆非所以防未然而窒
不軌此南北軍之所爲置也南軍所以衛宮城者也
主之者衛尉其屬有南北宮二衛士左右二都侯南
屯公軍蒼龍元武北屯朱雀東明朔平八司馬凡衛
士二千四百六十九人然衛尉主兵殿外而主兵殿
門內則爲光祿勳其屬有左右五官中郎將虎賁羽
林郎左右監凡衛士三千四百六十一人北軍所以
衛京城也主之者中尉其屬有中壘越騎步兵長水
射聲屯騎胡騎虎賁八屯校尉而胡騎不常置惟中

壘射聲虎賁屯騎在城中餘屯則皆留城外總凡軍士三千五百三十六人而胡騎虎賁所領士數無所考大抵衛尉主南軍以衛宮城實居乎內中尉主北軍以衛京城實居乎外相爲表裏其勢常相均然亦使之自相爲制焉以史考之北軍在外而或兼乎南軍南軍在內而常重乎北軍何也國有大故則北軍亦環宮而屯故五校常入爲宿衛之兵是北軍或兼乎南軍也吳漢之薨發北軍五校輕車介士以送葬而不易於發南軍是南軍嘗重乎北軍也豈其兼乎

南軍者在外之兵多重乎北軍者在內之兵精故歟然古者內兵不外出以根本之當壯衛翼之當嚴也漢初猶存古意南北二軍未嘗出雖嘗出矣而其出未嘗遠高帝十一年發中尉卒軍灞上文帝三年發中尉材官軍長安故曰雖出而未嘗遠也至于武帝始以衛尉擊南粵宣帝又以羽林飮飛諸兵擊諸羌厥後自明帝至順帝南軍遠出者二北軍遠出者六而高帝建軍之本意於是廢矣竊嘗論之天下形勝惟地與兵漢都長安阻河山之險左殽右蜀太華涇

渭表裏襟帶金城千里隱然天府之國矣而南北二
軍負城環宮路必而營列棋峙而星布平居無事則
虎視眈眈四征不庭則如火烈烈戎心肝膽戰栗駭
落孰敢弗率以干我天威可謂兵形地勢兩兼得之
于以鎮安四方鞏固萬代永永無斃高帝之貽燕于
厥子孫者神謀聖略何其宏遠也是用著其建軍之
本意以詔後世若乃官名之更革損益先後不同士
卒之調遣增減始終有異已詳於簡牘者茲不復書

唐兩省記

人君居至尊之位其職無他在乎任相而已若稽古
昔黃帝命六相舜舉十六相而相之名始立湯之左
右用伊虺周之左右用周召而相之員始定蓋相者
所以寅亮帝載緝熙皇極佐天子而統大政者也人
君非相焉是賴其孰相與共理天下乎唐有天下稽
古建官置門下中書兩省以爲左右相之所治而門
下有侍中中書有令則所謂左右相也然而初無定
名亦無常員或曰同中書門下平章政事則無定名
也侍中及令其人不常置而尙書左右僕射亦宰相

職則無常員也雖其定名常員先後不同而其佐天子以統大政者職任惟均其事權固無與比隆者矣惟門下有省昉於晉中書有省肇於魏齊嘗以門下爲黃門隋或以中書爲內省而唐自高祖太宗之世門下中書式遵往制至高宗龍朔元年始改門下爲東臺中書爲西臺武后光宅元年改門下爲鑾臺中書爲鳳閣元宗開元元年又改門下爲黃門省中書爲紫薇省尋皆輒復舊蓋門下中書在宣政殿之東西而尙書在外謂之南省故門下中書總稱北省又